

每週經課朗誦經文(巴克禮漢羅/教羅)2013/10/27

共同經課 - 1 約珥書二章二十三節~三十二節

23 錫安 ê 百姓 ah, lín tiòh 快樂, ùi 耶和華 lín ê 上帝來歡喜; 因為祂用前 ê 雨及時賞賜 lín; 爲 tiòh lín 落雨水, 就是前 ê 雨, 後 ê 雨, kap 以前一樣。24 五穀場 beh 有麥滿滿, 窟中 ê 新酒 kap 油 beh 滿出來。25 我差到 lín 中間 ê 大軍隊, 就是第一種、第二種、第三種、第四種 ê 草蜢, 所食 hiah-ê 年冬, 我 lóng beh 還 lín。26 Lín beh 食來知足; 亦 beh o-ló lín ê 上帝耶和華 ê 名; 因為祂爲 tiòh lín 行奇妙 ê 事, 我 ê 百姓的確永遠無見笑。27 Lín 就 beh 知我 tī 以色列 ê 中間, koh 知我是耶和華 lín ê 上帝, 以外無別 ê; 我 ê 百姓的確永遠無見笑。28 了後我 beh 用我 ê 神降落 hō 凡有肉體 ê; lín ê kiáⁿ cha-bó-kiáⁿ beh 做先知講話, lín ê 老人 beh 得 tiòh 眠夢, lín ê 少年人 beh 看見異象; 29 tī hiah-ê 日, 我 beh 用我 ê 神降落 tī 奴僕奴婢。30 我 beh 顯明奇事 tī 天裡, tī 地裡, 血 kap 火; kap 火薰 ê 柱。31 日頭 beh 變烏暗, 月 beh 變做血, tī 耶和華大 koh thang 驚 ê 日未到 ê 事先。32 到 hit 時, 見有求叫耶和華 ê 名 ê, beh 得 tiòh 救; 因為 tī 錫安山 kap tī 耶路撒冷 beh 有逃脫 ê 人, 照耶和華所講 ê, tī chhun ê 百姓中 beh 有耶和華所召 ê。

共同經課 - 2 詩篇六十五篇

1 大衛 ê 詩歌, 交 hō 樂官。1) 上帝 ah, tī 錫安有人 o-ló teh thèng 候你; 亦 beh 對你謝所 hē ê 願。2 聽人祈禱 ê 主 ah, 見有血氣 ê lóng beh 就近你。3 罪惡 khah 贏我; 論到阮 ê 過失, 你 lóng beh 赦免。4 你所揀選, hō 伊親近你, Tiàm tī 你 ê 院內 ê, chit 號人有福氣; 阮 beh 因爲你 ê 厝, 你 ê 聖殿 ê 福氣, 來心滿意足。5 救阮 ê 上帝 ah, 你 beh 用威嚴, 秉公義來應阮; 你是地極 kap 海面遠遠 ê 人, Lóng 總所 oá 靠 ê。6 伊已經用大權能 hà 腰; 就用伊 ê 氣力安定 chiah-ê 山。7 Chiah-ê 海 hoā-hoā 哮, kap 其中海湧 hoā-hoā 哮, 以及萬百姓 ê 喧嘩, 伊 hō in 平靜。8 Khia 起地極 ê 人因爲你 ê 神跡來驚惶; 日出日落 ê 所在, 你 hō in lóng 歡喜。9 你眷顧土地, 落雨灌 ak 伊, hō 伊真肥; 上帝 ê 河, 伊 ê 水滿滿; 你 án-ni 備辦土地, 就是替人備辦五穀。10 你灌 ak 田園, 滿伊 ê 溝, 修平伊 ê 稜; 落好 ê 雨水, hō 土地軟軟; 其中所發生 ê 得 tiòh 你賜福。11 你用你 ê 恩典做年冬 ê 冕旒, 你 ê 路徑 lóng 有油 teh 滴。12 滴 tī 曠野 ê 草埔; 山頭用歡喜做帶來 hà。13 草埔用羊群做相來穿; 山谷用五穀做 moa 來蓋; In lóng 歡喜出聲, 來吟詩。

共同經課 - 3 提摩太後書四章六節~八節, 十六節~十八節

6 因爲 taⁿ 我 ê 血 teh 做灌奠, 我過世 ê 期到 lah。7 我已經爭戰好 ê 爭戰, 已經盡跑走 ê 路站, 已經守所信 ê 道理。8 Taⁿ 了後有義 ê 冕旒 kā 我備辦 hē-teh, 就是主做公義 ê 審判司 tī hit 日 beh hō 我; m-nā hō 我, 也 beh hō 見若欣慕伊顯現 ê 人。16 我頭一 pái 分訴 ê 時, 無人 oá 近我, 眾人 lóng 離開我; 願 chit-ê 罪無歸 tī in。17 但是主 khiā tī 我身邊, hō 我勇健, hō 所 tiòh 宣傳 ê tùì 我來一盡報揚, koh hō 外邦 lóng 聽見; 我也得 tiòh 救出 tī 獅 ê 嘴。18 主 beh 救我脫離 lóng 總 ê pháíⁿ-tāi, 也 beh 救我入 tī 伊天裡 ê 國; 願榮光歸伊到代代無盡。À-bēng。

共同經課 - 4 路加福音十八章九節~十四節

9 有 oá 靠家已做義來看輕別人 ê, 耶穌設一個譬喻 kā in 講, 10 有兩人上殿 beh 祈禱, 一個是法利賽人, 一個是抽餉 ê。11 法利賽人 khiā-teh, 家已祈禱講, 上帝 ah, 我感謝你, 因爲我無親像別人, 勒索、不義、姦淫, 也無親像 chit-ê 抽餉 ê。12 我一禮拜禁食兩 pái; koh 將凡所得 tiòh ê, 十份抽一份。13 但是 hit-ê 抽餉 ê 遠遠 khiā-teh, 連 kiáh 目 ñg 天也 m 敢; kan-ta 搥胸講, 上帝 ah, 憐憫我 chit-ê 有罪 ê 人。14 我 kā lín 講, Chit-ê 人 tò 去伊 ê 厝得 tiòh 稱做義贏過 hit-ê 人。因爲見若自高 ê beh hō 伊卑微; 家已卑微 ê beh 高升伊。